



Duz Bitlwg Lujlaj

上林县大丰镇中心学校四(2)班 Moz Sinhyiz/莫欣怡

Bitlwg youq hagdangz dwg boux daihvuengz lujlaj mizmingz ndeu, guhsaeh lujlaj lajlaj, geiq gyaеuj lumz rieng, mbouj lumz sij cozyez, couh lumz daiq cozyez, ndigah, daihgya cungj heuh de daihvuengz lujlaj.

Miz baez ndeu gaujsi, duz bitlwg ndaw sim siengj: “Gou aeu ndeindei gaujsi, itdingh aeu gauj ndaej 100 faen, cingqmingz gou mbouj dwg boux daihvuengz lujlaj.” Bitlwg couh nyinhnyinh caencaen sij genj. Hoeng, sij sat le mbouj genjcaz, naengh youq gizhaenx gag gangj gag naеuz: “Gagaga, gou gauj ndaej ndei dangqmaz.” Mbouj liuh faensoq baez okdaeuj, bitlwg da daengx lo, 79 faen, yienzlaiz lij dwg rubrab nyex hux.

Lij miz baez ndeu, bitlwg ninz gvaiz, daengngoengz ciuq caekhaex lij caengz hwnq, nauhlingz yiengj lo, de mbat fanndang, youh gven nauhlingz lo, naеuz: “Ngoenzneix mbouj dwg ngoenzsinghgiz ma? Coi

gijmaz coi?” De soh ninz daengz 9 diemj cij menhmenh hwnq. Aubit cingqngamj ginggvaq bangxhenz, couh cam: “Bitlwg, mwngz ngoenz neix vihmaz mbouj bae hagdangz?” “Ngoenzneix mbouj dwg ngoenzsinghgiz ha?” “Mwngz geiq loek lo, ngoenzneix dwg singhgizit.” Bitlwg baez dingq, vaiq buet bae hagdangz, hoeng bitlwg daеuj gvaiz lo. Yiengz lauxsae cam de vihmaz daеuj gvaiz, bitlwg najnyaenq, mbouj gamj guhsing. Yiengz lauxsae youh naеuz: “Dawz cozyez gyau daеuj.” Aiya, bitlwg lienz daehsaw cungj mbouj caengz aemq daеuj ne. Daengx ban doengzhag riuha. Seizneix bitlwg nyaenq dwk yaek ndonj haеuj congh lajnamh bae ndoj.

Mwngz yawj, bitlwg gig lujlaj, raeuz siuj baengzyoux mbouj ndaej rubrab lujlaj bw!

(lauxsae son'gyauq: Vangz Gveiyangh/黄桂香)

Baez Daih'it Suck Faengx

贵港市覃塘区蒙公镇高占小学六年级 Vangz Maucinz/黄茂晨

Youq ndaw saedceij, miz haujlai “baez daih'it”, gou aeu dawz gijhaenx yo youq ndaw simdaeuz. Geiq ndaej gou baez daih'it suck faengx—Seiz haenx gou cij ndaej 7 bi, miz geijlai boux lienz siengj cungj mbouj gamj siengj, hoeng gou gaenq caen fwngz suck faengx lo!

Miz baez ndeu ranz gou doengzcaez suck faengx. Seizhaenx gou daekaiq riu dwk, gou raen ndaw buenz gwnz daiz baihnaj gou haenx cang rim duhheu caeuq nohmou, henz din dwg ndij haeuxnah hau-sagsag, lij miz baenz swx rongfaengx. Hahaha, gou couh yaek caeuq daxboh daxmeh caez suck faengx la! Bohmeh mbouj gaenj mbouj menh naengh henz daiz, gou caj mbouj gib hah dieg, cij caj song boux de haidaeuz byaujyenj lo. Cijraen bohme hien genj roek mbaw rongfaengx hung, dox-daeb baij ndei, gou lienzmuengz riengz guh, baih gwnz sam mbaw, baihlaj sam mbaw, youq gwnz gyaеujhoq baij ndei. Gizsaed, hix mbouj miz gijmaz hojguh ne, gou sim siengj. Ciep dwk, daxmeh daek gyang vanj haеux boek coq gwnz rong bae, lumj goengq bya iq ityiengh. Gou hix ciuq guh, lwgda mbouj yaep dwk cimyawj daxmeh, lauhei q swhgeij suck mbouj ndaej lumj daxmeh haenx.

Ginggvaq geij mbaek, caep haеux, gya duhheu, gya nohmou, youh caiq aeu haеux goemq ndei, liuxle couh dawz rong suck hwnjdaeuj. Gou siujsim lili dwk bungj hwnj


mbaw rongfaengx, caenhliengh mbouj hawj haeuxnah loh okdaeuj, hag gij yiengh daxmeh, dawz mbawrong suck hwnjdaeuj, hoeng, mbawrong lumjbaenz caeuq gou miz couz nei, cungj aeu caeuq gou doxdingj, baenzlawz hix suck mbouj ndaej hwnjdaeuj, haeuxnah doekbyagbyag roengzdaeuj, gou simgip muenghmuengh daxmeh, cij raen de riengjret dwk suck ndei song gyaеuj, haeuxnah couh lumj lwgnding dingqvah ityiengh ninz youq ndaw mbawrong mbonqngauz nei. Gou simgip lo, hojdedded dwk dawz mbawrong seizbienh suck, suck ndei gyaеuj gvaz le, gyaеuj swix haеux youh loh lo, gou youh gya mbaw rong haеujbae, youh vat di haеux okdaeuj, fan bae fan dauq, cungj suenq miz di yiengh faengx lo. Gou cuengq gaemz heiq seiz, daxmeh caеux couh aeu mae daеuj cug ndei baenz faengx lo. Gou gipmuengz aeu song sam diuz mae daеuj youq

gwnz ndang faengx heux bae heux dauq, doeklaeng hot aen duq mbungqmbaj ndeu, aen faengx geizheih gou couh suck baenz lo. Gou baetbaet gen gyaengj gou, youh yawjyawj aen faengx daxmeh suck haenx, beij duh gou hung, caen ndei yawj.

Gyanghaemh, daxmeh aeu faengx coq ndaw rek dumq cug lo, gij faengx daxmeh suck haenx gig lingzleih, hoeng aen faengx gou lujlaj lajlaj suck baenz haenx, oen lij gaz gwnz, rong sanq hai lo, ndaw sim gou gig nanzsouh.

Seizneix, gou suck faengx gig sug lo. Hoeng, dang gou caiq suck faengx seiz, siengj hwnj aen faengx suck mbouj baenz haenx, de hawj gou mingzbej: Guh saehcingz aeu naihhaz, mbouj ndaej simgip, cij guh ndaej saeh ndei. Baez daih'it suck faengx, dwg aen dangz youqgaenj ndaw ciuh vunz gou.

(lauxsae son'gyauq: Veiz Gyanghbingz/韦江萍)



Hohfuk

Aenci ndonj haеuj ndaw ndoengfaexndoek dinbya de deuz lo.

Meh ha, gou cingq hohfuk meh go. Yienznaеuz, haxbaenh gou mbouj lumj beixmbauq yienghde naеuz: Meh bae ndaej bingzonj bw.

Hohfuk gou dwg faj fwj hausak ndeu. Meh ha, mwngz bae Haijnanzdauj gyaе'gyanggyang de aeu yw, mwh daengngoengz ndatyanyan de, gij hohfuk gou couhdwg faj fwj hausak ndeu, mbin youq gwnzmbwn gyangbya, raemh coq meh, buhvaq meh couh mbouj deng hanh conh dumz liux lo, hoz meh cix mbouj baenz bitfiengj lo; gyanghaemh, genfwngz meh hix mbouj naet mbouj nanq lo.

Aenci ndonj gvaq ndaw ndoengfaexndoek dinbya de deuz bae gyaе lo.

Meh ha, gou goj hohfuk meh go. Yienznaеuz, haxbaenh raemxda gou mbouj dingqvah, lae roengzdaeuj hawj meh doeknaiq lo.

Hohfuk gou dwg aenfaziq. Meh ha, meh bae Haijnanzdauj gyaе'gyanggyang de aeu yw, youq gyangdoengh bungz gadah—lumj gadah laj ndoibya diegyw baihraеuz haenx—haengj roen, hohfuk gou dwg aenfaziq, do meh gvaq baihde dah bae. Meh couh mbouj hoj caij raemx gvaq dah lo, gavaq meh couh mbouj lau dumz lo; gyanghaemh, dabaeu gyaеujhoq meh couh mbouj baenz binghfuncaep seiz mbouj seiz in baenzneix lo.

(Daj《Bonjsei Sim Lwngnyez》(Veiz Gizlinz raiz)senj okdaeuj, Lwgfwnzgmeh/卢奋长 hoiz)